



PETIKAN AKHBAR

Asri Hamidon, Ralph Marshall dilantik terajui Digital Nasional Bhd – Kementerian Kewangan

PETIKAN AKHBAR | 01 MAC 2021



KUALA LUMPUR, 1 Mac – Kementerian Kewangan (MoF) mengumumkan pelantikan Ketua Setiausaha Perbendaharaan Datuk Asri Hamidon sebagai pengerusi Digital Nasional Berhad (DNB) manakala Augustus Ralph Marshall sebagai ketua pegawai eksekutif Syarikat Tujuan Khas (SPV) itu bagi membangunkan teknologi 5G di Malaysia.

Dalam kenyataan pada Isnin, MoF berkata ahli-ahli Lembaga Pengarah DNB terdiri daripada Ketua Pengarah Unit Pemodenan Tadbiran dan Perancangan Pengurusan Malaysia (MAMPU) Jabatan Perdana Menteri, Datuk Seri Dr Yusof Ismail selain Datuk Mohamed Sharil Tarmizi serta Datuk Muthanna Abdullah.

Lantikan tersebut adalah susulan pengumuman Rangka Tindakan Digital Malaysia, MyDIGITAL oleh Perdana Menteri Tan Sri Muhyiddin Yassin pada 18 Februari lepas dan pengumuman oleh Suruhanjaya Komunikasi dan Multimedia Malaysia mengenai pelancaran 5G di negara ini.

“Gabungan lantikan profesional dengan pengkhususan dalam sektor-sektor seperti kewangan awam,

penguatkuasaan telekomunikasi, teknologi maklumat, telekomunikasi dan perundangan merupakan kombinasi kemahiran dan pengalaman yang tepat untuk membina, memiliki dan menguruskan rangkaian 5G Malaysia untuk pelancaran komersial di seluruh negara.

"Ahli pengurusan kanan DNB akan diumumkan pada masa yang terdekat," kata kementerian itu.

Sementara itu, Menteri Kewangan, Tengku Datuk Seri Zafrul Tengku Abdul Aziz berkata adalah penting bagi rangkaian 5G tersebut dilancarkan segera, secara sistematik dan profesional untuk memacu inisiatif pertumbuhan negara melalui MyDIGITAL bagi memastikan kemajuan sosioekonomi dan keterangkuman untuk semua rakyat.

"Kita tidak boleh ketinggalan ketika seluruh dunia pantas menggunakan teknologi seperti kecerdasan buatan, kenderaan pandu sendiri, robotik, Internet of Things atau IoT (Internet Benda), pengkomputeran awan dan 'digital twin' untuk terus mencipta peluang baru bagi pertumbuhan masa hadapan," katanya.

Beliau juga mengucapkan tahniah kepada semua yang telah dilantik dan secara keseluruhannya merupakan gabungan bakat dan pengalaman yang amat sesuai bagi memastikan akses saksama kepada keupayaan 5G untuk rakyat dan perniagaan.

Tengku Zafrul berkata, bagi membantu Malaysia mencapai aspirasi 5G negara, kerajaan juga berharap dapat bekerjasama dengan sektor swasta dalam industri telekomunikasi domestik.

Menurutnya, menerusi fokus DNB kepada pelaburan infrastruktur 5G, pemain sektor swasta dapat menumpukan usaha mereka kepada penyampaian produk dan perkhidmatan yang lebih baik, tanpa dibebani oleh pelaburan yang besar atau perbelanjaan modal yang bertindih dengan kerajaan.

"Ini adalah satu situasi yang memberi manfaat kepada semua pihak, termasuk pengusaha telekomunikasi, perniagaan dan pengguna demi penumpuan ke arah penyediaan 5G menjelang akhir 2021," kata beliau.

DNB akan menawarkan perkhidmatan 5G melalui model borong yang dirangka untuk memastikan ketelusan dan pelaksanaan yang lebih baik.

Menurut MoF, ini akan diuruskan berlandaskan kerangka tadbir urus yang sesuai, proses tender terbuka bagi pembangunan infrastruktur 5G, serta amalan terbaik global untuk memastikan pengurusan yang mantap.

"Semua pemain perkhidmatan telekomunikasi akan mendapat akses terbuka, adil dan setara di dalam mendapatkan perkhidmatan rangkaian 5G secara borong untuk pembangunan perkhidmatan runcit berlandaskan teknologi 5G ini."

Bernama

 [Siaran Media](#)

 [Koleksi Ucapan](#)

 [Petikan Akhbar](#)

 [Foto](#)

 [Video](#)

 [Pengumuman](#)

 [Laporan LAKSANA](#)

 [Tender](#)

POPULAR TAGS

[BERNAMA](#)[TENGKU ZAFRUL](#)[BAJET 2022](#)[COVID-19](#)[LAPORAN LAKSANA](#)[TMK 1](#)[KELUARGA MALAYSIA](#)[PENJANA](#)[PRIHATIN](#)[TEAM MOF](#)[PRICE OF PETROLEUM](#)[HARGA MINYAK](#)

Copyright © 2021 Kementerian Kewangan Malaysia. All Rights Reserved.

[Dasar Privasi](#)[Dasar Keselamatan](#)[Penafian](#)[Peta Laman](#)[Bantuan
Arkib](#)